

Svasti Vachanam

——
स्वस्तिवाचनम्

——
Document Information



Text title : Svastivachanam

File name : svastivAchanam.itx

Category : veda, svara

Location : doc_veda

Transliterated by : Kr. PK

Proofread by : Kr. PK

Latest update : November 28, 2023

Send corrections to : sanskrit at cheerful dot c om

This text is prepared by volunteers and is to be used for personal study and research. The file is not to be copied or reposted without permission, for promotion of any website or individuals or for commercial purpose.

Please help to maintain respect for volunteer spirit.

Please note that proofreading is done using Devanagari version and other language/scripts are generated using **sanscript**.

November 28, 2023

sanskritdocuments.org



स्वस्तिवाचनम्



ॐ श्री गणेशाय नमः ॥

आ नो॑ भ॒द्राः क्र॑तवो यन्तु॒ विश्व॑तोऽद॒ब्धासो॑ अप॒रीता॑स उ॒द्धिदः॑ ।
दे॒वा नो॑ यथा॒ सद॑मिद् वृ॒धे अ॑स॒न्नप्रा॑युवो र॒क्षितारो॑ दि॒वेदे॒वे ॥
दे॒वानां॑ भ॒द्रा सु॑म॒तिर्ऋ॑जू॒यतां॑ दे॒वानां॑ रा॒तिर॒भि नो॑ नि॒ वर्त॑ताम् ।
दे॒वानां॑ स॒ख्यमु॑प॒ सेदि॑मा व॒यं दे॒वा न॑ आ॒युः प्र॑तिर॒न्तु जी॑वसे ॥
तान्पूर्व॑या नि॒विदा॑ हू॒महे व॑यं भ॒गं मि॒त्रम॑दि॒तिं द॑क्ष॒मस्त्रि॑धम् ।
अ॒र्यम॑णं वरु॒णं सो॑म॒मश्वि॑ना स॒रस्व॑ती नः सु॒भगा॑ म॒यस्कर॑त् ॥
तन्नो॑ वातो॒ मयो॑भुवा॒तु भे॑ष॒जं तन्मा॑ता पृथि॒वी तत्पि॑ता द्यौः ।
तद् ग्रा॒वाणः॑ सो॒मसु॑तो॒ मयो॑भुव॒स्तद॑श्विना शृणु॒तं धि॑ष्ण्या यु॒वम् ॥
तमी॑शा॒नं ज॑ग॒तस्त॑स्थुष॒स्पतिं॑ धि॒यंजि॒न्वम॑वसे हू॒महे व॑यम् ।
पू॒षा नो॑ यथा॒ वेद॑सा॒मस॑द्बृ॒धे र॑क्षि॒ता पा॑युरद॒ब्धः स्व॑स्तये ॥
स्व॒स्ति न॑ इन्द्रो॒ वृद्ध॑श्र॒वाः स्व॒स्ति नः॑ पू॒षा वि॒श्ववै॑दाः ।
स्व॒स्ति न॑स्ता॒क्षर्यो॑ अ॒रि॒ष्टने॑मिः स्व॒स्ति नो॑ बृ॒हस्प॑तिर्दधातु ॥
पृष॑दश्वा मरु॒तः पृ॒श्निमा॑तरः शु॒भंया॑वानो वि॒दथे॑षु ज॒गम॑यः ।
अ॒ग्नि॒जिह्वा॑ मनवः॒ सूर॑च॒क्षसो॑ वि॒श्वे नो॑ दे॒वा अ॒वसा॑ ग॒मन्नि॑ह ॥
भ॒द्रं कर्णे॑भिः शृणु॒याम॑ दे॒वा भ॒द्रं प॑श्येमा॒क्षभि॑र्यजत्राः ।
स्थि॒रैरङ्गै॑स्तुष्टुवांस॒स्तनू॑भिर्व्यशेम दे॒वहि॑तं यदायुः ॥
श॒तमि॑न्नु श॒रदो॑ अ॒न्ति दे॒वा यत्रा॑ नश्च॒क्रा ज॑रसं त॒नूना॑म् ।
पु॒त्रासो॑ यत्र पि॒तरो॑ भव॒न्ति मा नो॑ म॒ध्या री॑रिष॒तायु॑र्गन्तोः ॥
अ॒दि॒तिर्द्यौर॑दि॒तिर॒न्तरि॑क्ष॒मदि॑तिर्मा॒ता स पि॑ता स पु॒त्रः ।

विश्वे॑ दे॒वा अदि॑तिः पञ्च जना॑ अदि॑तिर्जा॒तमदि॑तिर्जनि॑त्वम् ॥ (शुक्ल यजुर्वेद २५ । १४-२३)

द्यौः शान्ति॑रन्तरि॑क्षः शान्तिः॑ पृथि॑वी शान्ति॑रापः शान्ति॑रोष॑धयः शान्तिः॑ ।
वन॑स्पतयः शान्ति॑र्विश्वे॑ दे॒वाः शान्ति॑र्ब्रह्म॑ शान्तिः॑ सर्वः॑ शान्तिः॑ शान्ति॑रे॒व शान्तिः॑ सा
मा॑ शान्ति॑रेधि ॥ (शुक्ल यजुर्वेद ३६ । १७)

यतो॑यतः समी॑हसे॒ ततो॑ नोऽभ॑यङ्कुरु ।

शन्नः॑ कुरु॑प्रजाभ्योऽभ॑यन्नः पशु॑भ्यः ॥ सुशान्ति॑र्भवतु ॥ (शुक्ल यजुर्वेद ३६ । २२)

गणा॑नां त्वा गण॑पतिः हवामहे॑ प्रि॒याणां॑ त्वा प्रि॒यपतिः॑ हवामहे॑
निधि॑नान्तवा॑निधि॑पतिः हवामहे॑ वसोमम ।

आह॑मजानिगर्भ॑धमात्वम॑जासिगर्भ॑धम् ॥

अम्बे॑ऽम्बिके॑ऽम्बालि॑केनमानयति॑कश्चन ।

सस॑स्त्यश्वकः सुभ॑द्रिकाङ्गाम्पीलवा॑सिनी॑म् ॥

स्वस्तिवाचनम्

निस्वरः



ॐ श्री गणेशाय नमः ॥

आ नो भद्राः क्रतवो यन्तु विश्वतोऽदब्धासो अपरीतास उद्भिदः ।

देवा नो यथा सदमिद् वृधे असन्नप्रायुवो रक्षितारो दिवेदिवे ॥

देवानां भद्रा सुमतिर्ऋजूयतां देवानां रातिरभि नो नि वर्तताम् ।

देवानां सख्यमुप सेदिमा वयं देवा न आयुः प्रतिरन्तु जीवसे ॥

तान्पूर्वया निविदा हूमहे वयं भगं मित्रमदितिं दक्षमस्त्रिधम् ।

अर्यमणं वरुणं सोममश्विना सरस्वती नः सुभगा मयस्करत् ॥

तन्नो वातो मयोभुवातु भेषजं तन्माता पृथिवी तत्पिता द्यौः ।

तद् ग्रावाणः सोमसुतो मयोभुवस्तदश्विना शृणुतं धिष्ण्या युवम् ॥

तमीशानं जगतस्तस्थुषस्पतिं धियंजिन्वमवसे हूमहे वयम् ।

पूषा नो यथा वेदसामसद्वृधे रक्षिता पायुरदब्धः स्वस्तये ॥

स्वस्ति न इन्द्रो वृद्धश्रवाः स्वस्ति नः पूषा विश्ववेदाः ।

स्वस्ति नस्ताक्षर्यो अरिष्टनेमिः स्वस्ति नो बृहस्पतिर्दधातु ॥

पृषदश्वा मरुतः पृश्निमातरः शुभंयावानो विदथेषु जग्मयः ।

अग्निजिह्वा मनवः सूरचक्षसो विश्वे नो देवा अवसा गमन्निह ॥

भद्रं कर्णेभिः शृणुयाम देवा भद्रं पश्येमाक्षभिर्यजत्राः ।

स्थिरैरङ्गैस्तुष्टुवांसस्तनूभिर्व्यशेम देवहितं यदायुः ॥

शतमिन्नु शरदो अन्ति देवा यत्रा नश्चक्रा जरसं तनूनाम् ।

पुत्रासो यत्र पितरो भवन्ति मा नो मध्या रीरिषतायुर्गन्तोः ॥

अदितिर्द्यौरदितिरन्तरिक्षमदितिर्माता स पिता स पुत्रः ।

विश्वे देवा अदितिः पञ्च जना अदितिर्जातमदितिर्जनित्वम् ॥ (शुक्ल यजुर्वेद २५ । १४-२३)

द्यौः शान्तिरन्तरिक्षं शान्तिः पृथिवी शान्तिरापः शान्तिरोषधयः शान्तिः ।
वनस्पतयः शान्तिर्विश्वेदेवाः शान्तिर्ब्रह्म शान्तिः सर्वं शान्तिः शान्तिरेव शान्तिः सा मा
शान्तिरेधि ॥ (शुक्ल यजुर्वेद ३६ । १७)

यतोयतः समीहसे ततो नोऽभयङ्कुरु ।

शन्नः कुरुप्रजाभ्योऽभयन्नः पशुभ्यः ॥ सुशान्तिर्भवतु ॥ (शुक्ल यजुर्वेद ३६ । २२)

गणानां त्वा गणपतिं हवामहे प्रियाणां त्वा प्रियपतिं हवामहे निधिनान्तवानिधिपतिं
हवामहे वसोमम ।

आहमजानिगर्भधमात्वमजासिगर्भधम् ॥

अम्बेऽम्बिकेऽम्बालिकेनमानयतिकश्चन ।

ससस्त्यश्वकः सुभद्रिकाङ्गाम्पीलवासिनीम् ॥

Encoded and proofread by Kr. PK

—
Svasti Vachanam

pdf was typeset on November 28, 2023

—

Please send corrections to sanskrit@cheerful.com

